



La realisaziun da la reforma da vischnancas e dal territori cumenza cun il project parzial «Vischnancas burgaisas». Thomas Kollegger e Martin Schmid (da sanester).

FOTO R. CANAL

Refurma da vischnancas e dal territori: La realisaziun vegn lantschada

■ (cc) La realisaziun da la reforma da vischnancas e dal territori cumenza cun il project parzial «Vischnancas burgaisas». La regenza grischuna ha avert la procedura da consultaziun en chaussa. Il punct central dal project è la renunzia a la fusiu automatica da las vischnancas burgaisas, sche las vischnancas politicas fusiuneschan. Uschia sa lascha eliminar in impediment existent per fusiuns da vischnancas, perquai che las vischnancas burgaisas n'èn betg pli pertutgadas directamain d'ina fusiun da las vischnancas politicas.

En sia sessiun da favrer 2011 è il cussegl grond sa fatschentà intensivamain cun la reforma da vischnancas e dal territori. En quest connex è il parlament s'exprimì per ina simplificazion fundamentala da las structuras statalas che duai vegnir realisada d'ina vart cun agid d'ina refurma da vischnancas e da l'autra vart cun ina refurma dal territori. Las decisiuns fundamentalas clerias dal cussegl grond èn stadas in segn per la regenza da prender per mauns immedia-tamain las lavurs da realisaziun.

Stgars 3 mais pli tard vegn il project parzial «Vischnancas burgaisas» – sco emprim project da realisaziun en il rom

da la refurma da vischnancas – tramess en consultaziun. Tenor l'art. 89 da la lescha da vischnancas actuala vala la fusiu da las vischnancas politicas er automaticamain per las vischnancas burgaisas correspondentes. Tenor la voluntad dal cussegl grond duai vegnir abolì quest automatissim che ha effects dischavantagius en la pratica per fusiuns da vischnancas. La fusiu da las vischnancas politicas na chaschuna betg pli automaticamain la fusiu da las vischnancas burgaisas. Uschia po vegnir eliminà in eventual impediment da fusiun.

Per quest intent ston vegnir adattadas la constituziun chantunala (art. 61) sco er plirs artitgels da la lescha da vischnancas. En l'avegnir duain las vischnancas burgaisas pudair fusiunar sco fin uss en il rom da fusiuns da vischnancas politicas, ellas na ston dentant betg far quai stringentamain. Quai ha per consequenza che las vischnancas burgaisas vertentas pon exister er vinavant, malgrà la fusiu da vischnancas politicas. Suenter ina fusiun po il territori d'ina vischnanca politica perquai cum-pigliar en l'avegnir pliras vischnancas burgaisas. Quellas disponan vinavant da la facultad burgaisa respectiva ed èn

cumpetentas per conceder il dretg da burgais.

Perquai che las vischnancas burgaisas pon exister vinavant en il futur – independentamain d'ina fusiu da las vischnancas politicas – vegn strigtgada la pussaivladad da pudair externalisar a medem temp la facultad burgaisa or da la vischnanca burgaisa. La regenza vul uschia evitar che la finamira da simplifitgar las structuras vegnia impe-dida e ch'i dettia anc ulteriurs subjects giuridics. Da quai poi mo vegnir diver-già, sche las vischnancas burgaisas exi-stentas fusiuneschan cun la vischnanca politica e sa schlian a medem temp. In tal subject giuridic externalisà vegn sur-veglià da la vischnanca politica, e quella sto guardar ch'il bain public restia en ils mauns da la publicidad. La consultaziun dura fin la fin d'avust 2011. Dals documents da consultaziun poi vegnir prendì invista sin la pagina d'internet dal departament da finanzas e da vischnancas (www.dfg.gr.ch).

Las ulteriuras incumbensas dals conclus dal cussegl grond vegnan elavuradas en projects parzials. Iis projects correspundents vegnan tramess en consultaziun en il decurs dals onns 2011 fin 2012.